

PUDDICOMBE, ANNE ADALISA ('Allen Raine'; 1836 - 1908), nofelydd

Enw: Anne Adalisa Puddicombe
Ffugenw: Allen Raine
Dyddiad geni: 1836
Dyddiad marw: 1908
Priod: Beynon Puddicombe
Rhiant: Benjamin Evans
Rhiant: Letitia Grace Evans (née Morgan)
Rhyw: Benyw
Galwedigaeth: nofelydd
Maes gweithgaredd: Llenyddiaeth ac Ysgrifennu
Awdur: David Jenkins

Ganwyd 6 Hydref 1836 yn Bridge Street, Castellnewydd Emlyn, Sir Gaerfyrddin, yn blentyn hynaf Benjamin a Letitia Grace Evans. Cyfreithiwr oedd ei thad, ac yn wŷr i **David Davis**, Castell Hywel, ac yr oedd ei mam yn ferch i Thomas Morgan, meddyg o Gastellnewydd, ac yn wŷres i **Daniel Rowland**, Llangeitho.

Yn ei mebyd aeth i ysgol i Gaerfyrddin, ac o 1849 hyd 1851 addysgwyd hi gyda theulu Henry Solly, gweinidog gyda'r Undodiaid yn Cheltenham. Rhwng 1851 a 1856 bu'n byw gyda chwaer iddi yn Southfields, ger Wimbledon. Dysgodd Ffrangeg ac Eidaleg, ac yr oedd yn gerddor medrus. Dychwelodd i Gymru yn 1856, ac yno y treuliodd y 16 mlynedd dilynol.

Ar 10 Ebrill 1872, yn eglwys Penbryn, Sir Aberteifi, priododd Beynon Puddicombe, cynrychiolydd tramor ariandy Smith Payne, Llundain. Aethant i fyw i Addiscombe ger Croydon am yr wyth mlynedd dilynol, ac yna i Winchmore Hill, swydd Middlesex. Ym mis Chwefror 1900, oherwydd afiechyd meddwl ei phriod, symudodd i Bronmor, Traethsaith, Sir Aberteifi, ac yno, 29 Mai 1906, y bu ef farw. Yno y bu hithau hefyd farw ar 21 Mehefin 1908. Claddwyd hwynt ill dau ym mynwent eglwys Penbryn.

Yn ei hieuentid cyhoeddodd gyda chymorth ychydig o ffrindiau llengar gyfnodolyn yn dwyn y teitl *Home Sunshine*, a argraffwyd yng Nghastellnewydd Emlyn, ond byrhoedlog fu. Yn 1894 rhannodd hanner y wobr yn eisteddfod genedlaethol Caernarfon am stori-gyfres gyda chefnidir Cymreig, a chyhoeddwyd hi yn y *North Wales Observer* o dan y teitl 'Ynysoer.' Ym mis Mehefin 1896 gorfennodd sgrifennu nofel a alwodd yn *'Mifanwy,'* ond wedi'i gwrthod gan chwe chyhoeddwr newidiodd y teitl i *A Welsh Singer*, gan 'Allen Raine,' a chyhoeddwyd hi ym mis Awst 1897. Trosodd hon yn ddrama, ond unwaith yn unig y perfformiwyd hi. Ar ôl hyn cynhyrchoedd un nofel ar ôl y llall, sef *Torn Sails*, 1898; *By Berwen Banks*, 1899; *Garthowen*, 1900; *A Welsh Witch*, 1902; *On the Wings of the Wind*, 1903; *Hearts of Wales*, 1905; and *Queen of the Rushes*, 1906 (a gynnwys ddiwyddiadau o ddiwygiad 1904 a 1905). Ar ôl ei marw cyhoeddwyd *Neither Store-house nor Barn*, 1908 (a ymddangosasai eisoes yn 1906 fel stori-gyfres yn y *Cardiff Times*); *All in a Month*, 1908 (stori yn ymwneud ag afiechyd ei gwŷr); *Where Billows Roll*, 1909; *Under the Thatch*, 1910 (stori yn ymwneud â'r cancr a fu'n achos angau i'r awdur). Yn 1909 cyhoeddwyd *An Allen Raine Birthday Book*. Sgrifennodd nifer o straeon i gylchgronau, ac yn **Wales**, 1897, cyf. iv, cyhoeddwyd cyfieithiad Saesneg ganddi o 'Alun Mabon' (**Ceiriog**).

Awdur

Dr David Jenkins, (1912 - 2002)

Ffynonellau

D. L. Thomas, Puddicombe, Mrs. Anne Adalisa, writing under the pseudonym of Allen Raine (1836-1908) *Oxford Dictionary of National Biography*, 1912

South Wales Daily News, 23 Mehefin 1908

Western Mail, 23 Mehefin 1908

Yr Ymfynydd, Medi 1908

Wales, the National Magazine for the Welsh People, Mai 1911

Darllen Pellach

Juliet Larsen, *Allen Raine - a distinctive female voice in Wales*

Sally Roberts Jones, Puddicombe [née Evans], Anne Adalisa [pseud. Allen Raine] (1836-1908) *Oxford Dictionary of National Biography*, 2004

Erthygl Wicipedia: Allen Raine

Gweithiau

Allen Raine, *A Welsh singer* (London 1897)

Dolenni Ychwanegol

VIAF: 75356354

Wikidata: Q4731836

Dyddiad cyhoeddi: 1953

Hawlfraint Erthygl: http://rightsstatements.org/page/InC/1.0/

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n tudalen codi arian am ragor o wybodaeth.



Arddull APA



Jenkins, D., (1953). PUDDICOMBE, ANNE ADALISA ('Allen Raine'; 1836 - 1908), nofelydd. *Y Bywgraffiadur Cymreig*. Adferwyd 11 Tac 2024, o <https://bywgraffiadur.cymru/article/c-PUDD-ADA-1836>



Preifatrwydd a Chwcis
Hawffraint
Y Prosiect
Cymorth
Cysylltu

LGC
NLW

LLYFRGELL
THE NATION

